

E P I T O M E .

XV-virum, qui ad X-viros adscribebantur, magistratus, re magnis contentionibus agitata, est abrogatus. Kalendarium emendatum, annusque instauratus nova Gregorii XIII. constitutione, cui tamen ne parerent Graecae Venetorum insulae, Senatus impetravit. Amuratbe in Persicum bellum verso, cum Florentini & Melitenses Equites libere toto mari piraticam facerent, horum galeonem Contaremus cepit. Ad Aquilejense negotium Pontifex redierat, cum, illo intermisso, ad Christianorum in Turcas arma concitanda curam omnem vertit, Latinumque Ursinum hac de re Venetias misit. Melitensium insolentiam, quatuor eorum triremibus captis, Philippus Paschalicus repressit. Eadem a Pontifice iterum de negotio Aquilejensi jactata: novae cum Florentinis ac Melitensibus ob maritimas excursiones discordiae exortae. Japoniorum Regum ad Pontificem legati Roma discedentes, Venetias accessere. Sub id tempus Gregorius XIII. mortuus est, ejusque in locum Xystus V. successit. Res Aquilejensis hoc Pontifice composita, omnisque simultatum materia sublata est. Qui rerum suarum status esset, Galliae Rex Henricus Senatus significavit. Nicolao Pontio Principi, qui e vivis excesserat, Paschalis Ciconia subrogatus. In Ludovicum Ursinum, interclusa laqueo anima, ob enorme facinus animadversum est. Centum aureorum millia Galliae Regi senatusconsulto Patres mutua dedere. Varii bellorum civilium in Gallia eventus, Hispanorumque contra Anglos conatus narrantur. Quod Henrico III. a Gallis post alterius Henrici mortem Regi salutato Senatus gratulatus erat, Xystus conquestus est, ejusque Nuncius, Messio oratori Principis conveniendi copia facta, Venetiis discessit; qui tamen redire a Pontifice jussus est. Respublica Henrico nihilominus favit, a quo alienus Pontificis aliorumque Italarum Principum animus.